







中州集卷第六



已集

馮內翰壁

二十五首

壁字叔獻別字天粹永安二年進士歷州  
 縣召入翰林再為曹郎宣宗朝屢以使指  
 鞫大獄權貴如婦德知府宿州總帥聲勢  
 焰焰朝廷知其跋扈而不能摧伏者叔獻  
 以法臨之毛髮不貸也幼有重名就所長  
 論之館閣臺諫與賓客言乃其選也徒以



小心奉法不畏疆禦故屢以城旦書屈之  
識者有用違其長之歎興定末以周知集  
慶軍節度使事致仕居嵩山龍潭者十餘  
年諸生從之游與四方問遺者不絕賦詩  
飲酒放浪山水間人望以爲神仙焉山中  
多蘭每中春作華山僧野客人持數本詣  
公以香韻高絕爲勝少劣則有罰謂之鬪  
蘭所釀松醪東坡所謂歎幽姿之獨高者

惟此獻能盡之客有以京國名酒來與之  
拔者味殊不能近正如深山草衣木食人  
語覺傭兒販夫塵土氣爲不可尚也是後  
松醪鬪蘭遂爲山中故事獻少日在太  
學賦聲籍甚其學長於春秋詩筆清峻似  
其爲人字畫楚楚有魏晉間風氣雅爲閑  
閑公所激賞制誥典麗當代少見其比尺  
牘又其專門之學風流蘊藉不減前世宋



景文左丞董公紹祖奉使江左得其詩餞  
行喜見顏間詩四韻每誦一句輒為一舉  
觴李右司之純談笑此世為不足玩見叔  
獻則必為之懽然王廷州從之公於鑒裁  
為海內稱首敬其名德至不敢以同年生  
數之北渡還鄉里年七十九終于家  
墓碑云所  
貴於君子者三曰氣曰量曰品有所克之  
謂氣有所受之謂量氣與量備而才行不  
與存焉本乎才行氣量而絕出才行氣  
量之上之謂品品之所在不風岸峻不

表曝而著不名位而重不耆艾而  
為天地之美器造物者靳固之不輕以予  
人閱百千萬人之眾歷數十百年之久乃  
一二見之同乎其時非無孤雋偉傑之士  
從容於禮文之域角逐乎功名之地唯其  
俗不可以為雅劣不可以為勝故自視缺  
然陳太丘事業無聞而名重天下房次律  
坐鎮雅俗而舉世以王佐許之施之當時  
未必適用然千載而下有為之歛衽者非  
品何以得之元光正大以來天下大夫士  
論公平生  
子渭字清甫以門資叙仕為密  
者蓋如此

院機察清慎而文天下有馮孝子之目今

居鎮陽



同裕之再過會善有懷希顏

寺元魏離宮十日來凡雨前與髯卿偕齋奠少林  
往其時已薄暮諸勝不暇訪今同魏諸孫再到風  
烟上寺僧導升殿雄深肅瞻仰柱礎門限砧追琢  
成大壯不見磨琢痕瑩滑明滉朗摩挲三歎息後  
世無此匠晚登西南亭碧玉對千丈如上官天柱  
如太華仙掌留宿贊公房秀色夢餘想夜靜耿不  
眠泉溜琴筑響惜髯今不來聯詩共清賞

和希顏

虎守天門未易通庾塵無扇障西風主人何負盜  
憎至公論不明私害公老伏固非千里嶼冥飛似  
是五噫鴻紛紛往事渠知幾都付崧巔一笑中

送國醫儀師顏企賢得請歸關中次朝賢韻

心平窮富恐欺天面有陰功蓋有年歸去青山仁  
者樂祕來丹訣老而傳尚醫冗食渠百輩公論共  
推君十全技道精微仍遠引就非輕舉亦幾仙



河山形勝圖

書劍丁年記昔游中條之麓過蒲州地形西控三  
秦遠河勢南吞二華秋晉魏兵爭一春夢漢唐壇  
祀幾荒丘披圖弔古今人慨不必重登鶴雀樓

雜帥覓蘭作詩以寄

雲插高牙画戟森春移寶檻燕堂深水南紅藥初  
退含嵩麓紫蘭今嗣音蠻足賴肩坐香累高粱華  
棟豈渠心使君有問花應語玉樹誠佳非故林

明皇擊梧桐圖

三郎耳譜趁花奴風調才情信有餘天寶錯來非  
一拍霓裳中節亦區區

送人出使

陽春有脚蘇痲瘵水鏡無心照潔汙九道澄清天  
意切人才一一似君無

習池醉歸圖

襄漢方屯十萬兵習池日往不曾醒紛紛悞晉皆



渠輩何獨王家一寧馨

東坡海南烹茶圖

講筵分賜密雲龍春夢分明覺亦空地惡九鑽黎  
洞火天游兩腋玉川風

陰晦中忽見華山

吏部能開衡嶽雲坡仙曾借海宮春蓮峯清曉忽  
自獻二公何人予何人

草堂春暮橫披

遷客倚樓家萬里五陵飛鞚酒千金草堂澹與春  
山對幽鳥一聲春已深

元光間予在上龍潭每春秋二仲月往往與  
元雷游歷嵩少諸監禪師汴公方事叅訪每  
相遇輒揮毫賦詩以道閒適之樂今猶夢寐  
見之兒子渭近以公故抵任城禪師附寄詩  
以叙疇昔未幾駐錫東菴因造謁間出示裕  
之數詩醉筆縱橫亦畧道舊事感歎之



餘漫賦長句二首

性理諸方已徧參  
歸來一錫駐東菴  
山中蓮社舊招隱  
旅舍阿戎新對談  
詩筆如君僧有幾  
文章媿我老無堪  
綾書大字拈香疏  
須趁微之酒半酣

又

少林脩竹欲天叅  
竹外幽關草結庵  
願我雖存惟白髮  
與君曾此共玄談  
干戈橫絕境猶夢  
草樹荒殘人豈堪  
鴈甕春醪髯莫預  
商歌悲壯不能酣

雨後看竝玉所控諸峯

竝玉如高人壁立  
九千仞一日不見之  
令人生鄙吝  
春深木葉敷秀色  
益濡潤結茅寄僧  
蓋晴碧時得趣  
老宿詫孫峯  
隅侍到齧亂連  
延青一色枚數  
須諦認溟濛空翠  
間我亦疑未信  
朝來雲氣昏埋  
沒瑜匿瑾如蒼梧  
政愁湘妃鬱思舜  
重陰俄解馭靈澗  
夕暉襯娟娟忽層  
出歷歷分遠近  
雲峰互吞吐千狀  
纔一瞬出奇如孫  
吳相降如蕪蘭如  
衆星



拱辰如侯伯入覲接武如翎簪承迎如价賓負固  
如吳楚爭長如齊晉恠詭如夷蠻駢羅貢琛贐窘  
感如擒獲係纍將就纍如應龍神靈蟄卧時奮迅  
如天駟超軼坳牧稅羈鞞如雄對改容失箸駭疾  
震如猛士無譁攢槩俟嚴陣獨兩峰巍然魁傑儼  
崇峻光輔岳柱天鬱爲中興鎮降生申與甫周室  
績復振詩傳配崧高百世磨不磷

同希顏恠松

嶠高地氣靈花木竟妍秀玉峰西南趾有松獨恠  
陋偃蹇如蟠螭奮迅如攫獸葉勁須髯張皮古鱗  
甲皴菌蠢藤瘦怒支離筇節瘦月上虬影搖風度  
雨聲驟子落慰枯禪枝樛礙飛鼬盤根萬乘器平  
盖千歲壽樵斤幸免尋厦匠矧肯構龍化會有時  
天早期汝救

王內翰若虛

三十八首

若虛字從之橐城人承安二年經義進士



少日師其舅周德卿及劉正甫得其論議  
爲多博學強記誦古詩至萬餘首他文稱  
是善持論李屏山杯酒間談辯鋒起時人  
莫能抗從之能以三數語窒之使噤不得  
語其爲名流所推服類此釋褐鄜州錄事  
歷門山令入翰林自應奉轉直學士居冷  
局十五年崔立之變群小獻諂爲立起功  
德碑以都堂命召從之從之外若遜辭而

實欲以死守之時議稱焉北渡後居鄉里  
癸卯三月東游與劉文季輩登泰山憩於  
黃峴峯之萃美亭談笑而化時年七十從  
之天資樂易負海內重名而不立厓岍雖  
小書生登其門亦折行輩友之滑稽多智  
而以雅重自持謀事詳審出人意表人謂  
從之於中外繁劇無不堪任直以投閒置  
散故百不一試耳自從之沒經學史學文



章人物公論遂絕不知承平百年之後當  
復有斯人否也子恕字寬夫

攄憤

非存驕蹇心非徼正直譽浩然方寸間自有太高  
處平生少諧合舉足逢怨怒禮義初不愆譎訕亦  
奚顧孔子自知名桓魋非所懼孟軻本不逢豈爲  
臧氏沮天命有窮達人情私好惡以此常泰然不  
作身外慮

贈王士衡

王生非狂者乃以善哭稱每至欲悲時不間醉與  
醒音詞初惻愴涕泗隨縱橫問之無所言坐客笑  
且驚王生不暇卹若出諸其誠陟陀與生友此意  
猶未明絲深動墨悲麟亡傷孔情韓哀峻嶺陟阮  
感窮途行涕流賈太傅音抗唐衢生古來哭者多  
其哭非無名生其偶然歟何苦摧形神如其果有  
爲爲爾同發聲



貧士歎

甌無塵瓶無粟北風蕭蕭吹破屋入門四顧何淒涼  
稚子低眉老妻笑世無魯子敬郭元振之真丈  
夫故應餓死填坑谷蒼天生我亦何意蓋世虛名  
食不足爭如只使冗且愚大腹便便飽梁肉

感秋

西風撼庭柯疎葉鳴榮榮天地一蕭條羈懷亦岑  
寂青春恍如昨轉盼年半百自從長大來轉覺日

月迫功名非所慕老大不足恤怛然感時心自亦  
不能釋清晨理短髮已見數莖白刀鐸雖可施殆  
似兒子劇此身委蛻耳毀棄無足惜况於毛髮間  
而乃強脩飾青青如陸展星星行復出畢竟白滿  
頭復將何所摘

生日自祝

空囊無一錢羸軀兼百疾况味何蕭條生意渾欲  
失清晨聞喧呼親舊作生日我初未免俗隨分略



州集 十一  
備飾舉觴聊自祝醉語盡情實神仙恐無從富貴  
安可必脩短卒同歸何足喜與戚一祈麓康強二  
願早關適衣食無大望但願了晨夕萬事不我撓  
一心常自得優游終吾身志願從此畢

失子

妍妍掌中兒捨我一何遽其來誰使之而復奄然  
去平生三舉子隨戚如朝露願我能無悲其如有  
天數自從學道來衆苦頗易度有後固所期誠無

亦何懼人生得清安政以累輕故婚娶眼前勞託  
遺身後慮百年曾幾何爲此離稚悞願語長號妻  
此理亦應論

憶之純三首

幼歲求真契中年得偉人傾懷當一面投分許終  
身燈火談玄夜鬢花逐勝春何時重一笑宵次欲  
生塵

又



面目三年隔音書萬里遙宦途俱蹭蹬日事各蕭  
條志大謀常拙身孤道易消本無當世用隱處會  
相招

又

雋氣輕天下高情到古人銜杯曼卿放下筆老坡  
神時論誰優劣人材自屈伸窮愁須理遣不必淚  
沾巾

復寄二首

志大言高與世違拂衣真作竹林歸黃塵道口風  
波惡未必先生自處非

又

自笑鬪塵亦強顏食謀未免敢言開紫芝果可充  
飢腹從子玉屏巖石間

病中二首

學道今何得謀生以不成藍衫幾棄物絳帳亦虛  
名事拙應天意友疎即世情煩憂時自解感觸又



還生

又

鬱鬱窮愁意營營以病身詩情渾欲減藥物但相親未得驅窮鬼終須問大鈞三時勞慰拊甚愧故人真

感懷

枉却全家仰此身書生那是治生人百憂耿耿填胸臆強作軟顏慰老親

自笑

酒得數杯還已足詩過兩韻不能神何須豪逸攀時傑我自世間隨分人

別家

到了身安是本圖何須身外覓浮虛誰能置我無飢地却把微官乞與渠

慵夫自號

身世飄然一瞬間更將辛苦送朱顏時人莫笑慵



夫拙差比時人得少閒

西城賞蓮呈晦之

晦之自號放公

舊賞回頭已隔年  
高花又見出新妍  
偶成濁酒狂歌會  
恰及斜風細雨天  
樂事適來偏有興  
閒身常得分無緣  
作詩莫怪多誇語  
差比放公先著鞭

和判題淵明歸去來圖五首

此下皆中年所作

靖節迷途尚爾賒  
若將覺悟向人誇  
此心若識真歸處  
豈必田園始是家

又

孤雲出岫暮鴻飛  
去住悠然兩不疑  
我自欲歸歸便了  
何須更說世相遺

又

拋却微官百自由  
應無一事掛心頭  
銷憂更藉琴書力  
借問先生有底憂

又

得時草木竟欣榮  
頗為行休惜此生  
乘化樂天知



浪語看君於世未忘情

又

名利醉心濃似酒貪夫袞袞死紅塵折腰不樂翻  
然去此老猶爲千載人

翰長開關公命題城南訪道圖戲作二詩且

爲解之云首

得道由來不必勞處兒舍又謾逋逃開關老子還  
多事時向招提打一遭

又

竹木蕭森蔭綠苔幽襟自愛北軒開主人無說吾  
何問乘興而來興盡迴

答鄭下辨禪師見戲代防禦高侯

酒肆淫房總道場偶然游戲亦何妨阿師自墮泥  
牛趣更笑春風柳絮狂

還家五韻

日日他鄉恨不歸歸來老淚更沾衣傷心何啻遠



東鶴不但人非物亦非

又

荒陂依約認田園  
松菊存亡不足論  
我自無心更  
懷土不妨猶有未招魂

又

山杏溪桃化棘榛  
舞臺歌榭墮灰塵  
春來底事堪  
行處門外流鶯枉與人

又

回思夢裏繁華事  
幸及當年樂此身  
闌立斜陽看  
兒戲憐渠虛作太平人

又

艱危嘗盡鬢成絲  
轉覺謹譁不可期  
幾度哀歌仰  
天問何如還我未生時

山谷於詩每與東坡相抗  
門人親黨遂有言  
文首東坡論詩右山谷之語  
今之學者亦多以爲然  
漫賦四詩爲商畧之云



絕足由來不可追汗流餘子費奔馳誰言直待南  
遷後始是江西不幸時

又

信手拈來世已驚三江袞袞筆頭傾莫將險語誇  
勅敵公自無心與物爭

又

戲論誰知出至公蠅蚋信美恐生風奪胎換骨何  
多樣都在先生一笑中

又

文章自得方爲貴衣鉢相傳豈是真已覺祖師低  
一著紛紛嗣法更何人

王內翰子端詩近來陡覺無佳思縱有詩成  
似樂天其小樂天甚矣漫賦三詩爲白傅解

嘲

功夫費盡謾窮年病入膏肓豈易鐫寄語雪溪王  
處士恐若猶是管窺天



東塗西抹鬪新妍時世梳粧亦可憐人物世衰如  
鼠尾後生未可議前賢

又

妙理宜人入肺肝麻姑搔背豈勝鞭世間筆墨成  
何事此老胸中自一天

麻徵君九疇

二十九首

九疇字知幾莫州人三歲識字七歲能草

書作大字有及數尺者故所至有神童之

目章廟召見問汝入宮殿中亦懼怯否對

曰君臣父子也子寧懼又耶上大奇之弱

冠任太學有聲場屋間南渡後讀書北陽

山中

其詩云讀書空山裏落月低巖幽山  
鬼語夜半惟我非巢由又云壯士半

凋落鐵花  
繡吳鉤

始以古學自力博通五經於易

春秋為尤長少時有惡疾就道士學服氣

數年疾遂平又從宛丘張子和學醫子和



以為能得其不傳之妙大率知幾於學也  
 專故所得者深飢寒勞苦人所不能堪者  
 處之怡然不以累其業也嘗為郾城張伯  
 玉賦透光鏡欽傳之京師趙禮部大加  
 賞異貼壁間坐卧讀之興定末府試經義  
 第一詞賦第二省試亦然簾試以脫悞下  
 第知幾先有才名又連中甲選天下想望  
 風采雖牛童馬走亦能道麻九疇姓名正

大三年右相侯蕭公趙禮部連章薦知幾  
 可試館職乃賜盧亞榜第二甲第一人及  
 第授太祝權太常博士應奉翰林文字知  
 幾天資野逸高騫自便與人交一語不相入  
 則逕去不返顧自度終不能與世合未幾  
 謝病去作詩工於賦物如夏英公篆韻

其詩

云千狀萬態了不同  
 如危巖地上畫繁如神農日中市圓如有  
 城乙鳥卵方如姜嫄巨履傾如怒觸不  
 周山遡如逆上蠶叢水積如女媧石未煉



碎如昆吾瓦經毀蚩尤旗張尾後曲黃帝  
鼎成足下峙五丈專車斷禹戈九日橫天  
落羿矢流漿不去龍垂髯銜書忽來鳳挽  
蘇方相回目關門關夔牛一脰踣階紀貌  
似心猜未必然賴及手植檜印章等詩可  
君注釋車南指見也字畫正書八分皆有功詩最其所長  
少時猶失持擇近詩精深峭刻似其為人  
他文不及也明昌以來以神童稱者五人  
太原常添壽四歲作詩云我有一卷經不  
用筆寫成展開無一字晝夜放光明合河

劉蒞文榮六歲有詩云鶯花新物態日月  
老天公劉徵伯祥七歲被旨賦鳳皇來儀  
新忌張漢臣世傑五六歲亦召入賦元妃  
素羅扇画梅云前村消不得移向月中栽  
其後常隱居不出餘三人者皆無可稱道  
獨知幾能自樹立一日名重天下耆舊如  
關關公且以徵君目之而不名也壬申歲  
遇亂卒年五十平山常仲明之子德葬之



小商橋傍近趙莊

賦伯玉透光鏡

太陰淪魄元不耀太陽分光成二曜嗚呼怪銅盜  
此幻透影在壁與背肖奩開燿燿光走庭劃如刺  
犀乍脫鞘泓澄秋落百丈潭疑有龍向天門跳秦  
娃漢婉化鴛土寵雨恩雲埋鳳詔當年椽塗鑑桃  
李身後泉臺暎蓬藿枕簟無情草木香笙歌不暖  
梟狐嘯鬪醜一醜不再妍不知持此將安照萬斛

珠璣委備人喚得偷兒成鬼剽借問金椎一控時  
何如海上青蠅弔壽如金石佳且好此銘此篆兩  
奇峭今誰子後曩誰先贏得紐樞經蟻竅千古繁  
華一夢醒恍然入手稱神妙丹砂□紫翠羽青萬  
金難買人年少君侯新自洛陽來玉臺人物今溫  
嶠相看大笑古人癡收鏡入奩還自笑

跋范寬秦川圖

山水人傳范家筆画史推尊爲第一榻來回看秦



川圖天下丹青能事畢大山巖巖如國君小山鬱  
鬱如陪臣大石盤盤社與稷小石落落士與民一  
山一形似爭長一石一態如布軍想君胸中有全  
秦見鍊削鍊鍊乃真掌上長安近於日千樹萬樹  
生青春憶昔岐山鳳凰語葱葱柞棧霑新雨昆夷  
束手密須降不見功勳見歌舞黃金鑄牛西入爨  
五丁雲棧通中國驪山宮闕九天高六處屏王走  
銜璧不信詩書信法家關東半被魚書惑畫卷圖

籀亦大好五十年兇都一掃章邯董翳舉如毛沐  
猴冠委金陵道北原兵自天而下漢室傾頽如解  
瓦祁山六出縱無功渭水猶堪飲君馬螭蟠老将  
骨未朽草付那能濟陽九技癢投鞭抵歲星歸來  
鹿苑何人手神武空矜賀六渾投機常落周人後  
竟令馮翊軟沙邊東風一夜吹新柳侵尋阜角相  
料理拋擲龍津浮汴水鷓頭過處已非隋不覺晉  
陽人姓李華清高宴憂宮梧舞馬如何護兩都縱



得青騾還蜀道肉得沙場白骨無興亡自取不足  
吁可憐神州爲盜區貪徵往古山川事忘却題詩  
賞画图

松筦同希顏欽叔裕之賦

犧尊青黃災木命羈絆剪剔傷馬性折松爲筦得  
之天此君幸免戕殘橫初象形似有代無不料奇  
功乃差勝人間斤斧不須勞坐中活火鳴笙簫千  
秋蟄骨養霜雪一日奮鬣翻雲濤巖烟擊拂殷雷

起顛風蹴踏銀山高莫嫌勺水懦無力如捲三江  
都一吸借汝歲寒姿扶我衰朽質埽除幻夢不到  
眼洗刷埃霾下胸臆捫霞直與羨門期一笑桑田  
海波白

竹癭冠爲李道人賦

東方有物字豐隆以鳴爲職驅群鱗萬頭濺濺囚  
凍窟欲出不出愁天公迴寒作暖出一噫黑帝不  
敢藏昆蟲所以獨爲六子長揮斤元氣周神功車



轟鼓震頃萬里六甲雲風隨喚起四陰用事合收  
聲猶奮狂陽鳴不已號令非時遭物玩草木不凋  
花再蕾惱得司秋訴帝閭漏泄機緘法當死天公  
大恠下桎梏推落車中隋巖谷非程非馬亦非人  
化作蒼莨一枝竹勁氣剛風難遽銷夜間風雨猶  
蕭蕭偁身直上三千尺天公文恠干雲霄鬼壓神  
縛不聽出只見白雲鎖三日雲散惟餘青屈盤頭  
隱於臍變仙質道人真是萬物盜斫取爲冠就天

巧秋霜爭敢上頭顱常與春風同醉倒此冠固竒  
惜未大有冠獨在方之外日月爲藤織四時煙霞  
爲樺綿千載天潢絕漢梁虛碧北斗旋衡簪沆瀣  
不隨脂粉侶俊猥不逐風霜陪獬豸一任旋乾復  
轉坤頭上峩峩終古在欲作檀那施此冠不識先  
生若爲戴

彈琴懷山中人

門前雪垂垂室中理朱絲手按十三徽心飛天一



涯故人渺何許萬里驚鴻飛試憑朱絲語一聲聲  
亦悲一彈雪欲落再彈雪正作只在此山中故人  
今憂樂我欲彈文王岐山雲渺茫我欲鼓曾子無  
田可耘耔道遠望不及千山復萬水思君復思君  
正恐須髯皤后夔若不來奈此宮商何春風早晚  
起百鳥喧庭柯時攜一尊酒爲君奏雲和

夏日

亭柯碧合龍蛇影睡起輓轡鳴曉井一簾曉雨捲

不晴槐花滿地黃金冷屈指西風又到門相思團  
扇欲生塵何時萬戶垂楊裏高揖金鞭逢故人

牛糞

誰憐宿料一生無身後仍遭金十奴帷蓋却教蒙  
狗馬不知何事負農夫

清明

村村榆火碧烟新拜掃歸來第四辰城裏看家多  
白髮遊春總是少年人



暮春山家二首

山烟向晚白濛濛  
人過梨花樹底風  
一犬不鳴村徑黑  
野燈孤起遠林中

又

語闌壯氣欲消磨  
奈此青燈永夜何  
壁上取琴彈一曲  
不知天外落銀河

手植檜印章

梁折山摧入小成  
日華留得寸暉明  
不盈一握空

蟲篆未喪斯文麗  
姓名草木西周朝  
有暮圖書東觀死  
猶生二千年後司  
封紐未信裁時出  
此情

贈裕之

向來三度見君詩  
常望西山有所思  
誰料并州天絕處  
相逢梁苑雪消時  
賢人樂古聲猶在  
聲叟文高世豈知  
只恐神嵩不留客  
秦川如画渭如絲

秋懷

江山如画衣冠盡蒲柳無情宮殿秋亦用此韵者也

昨夜新涼御褐裘  
一番節物弄清愁  
月懸雙杵若



爲夜人在一隅偏覺秋敗葉只能驚画扇啼蜚終  
不到朱樓還鄉夢斷寒衾曉依舊雲山是蔡州

和伯玉食蒿醬韻

九尺東方生不如一侏儒飲啄各有程厚薄與生  
俱文蒲及屈芟何乃淡以枯正如謝三旌甘心作  
羊屠伊蒿本薪材豈足克庖厨薄雪草堂徑新霜  
古城隅河南地差暖冬有不死蕪青來澗邊筍綠  
入几上孟徽香能侶菊小苦賢於茶酷烈變醞醢

薰醲破脂酥書生喜倒說食亦變精麤借問冰茶  
者何如羔酒乎况爾蓼彼蕭蓬茹固其徒偶然躡  
一等遽欲忘樵夫邇來歲頗飢太半殫在途攘肉  
或至犬首丘不如狐命賤祇求死計窮交議逋尚  
有紕袴兒朝夕食於株寧知掃野稗一飽不易圖  
遂令人輕生不畏鎖與鈇如君有蒿醬猶是千金  
軀

復和韻二首



五臟太多可張頤託矐儒自非何曾家安得海陸  
俱莊周幸有粟不至魚肆枯何勞夷門市下車朱  
亥屠春韭與秋菘歲晚不供厨蒿腹不蒿目大方  
果無隅爲醬非負口猶勝范菜蕪豈無青精飯  
顏炊一盂豈無菖蒲歎辟邪如神茶又豈無楸花  
除瘟等酴酥蒿於數品中頗同武官麤數品雖異  
饌置之醬可乎猶材各有施豈必皆吾徒公綽優  
爲老劣於滕大夫大抵食如士取之非一塗君詩

誌其味食經有董狐彼哉龜羹指斲棺終莫逋彼  
哉萍藿手竟死珊瑚株寧如醬以蒿不出本草圖  
蓋後人好奇一洗腥砧鉄爲謝饒崇鬼渠今離我  
軀

又翌日又爲履道所戲其意似欲窮吾技再和前章書呈伯玉

萬可爲炙啖博哉釋草儒奈何騷人詠不與蘭茝  
俱青青發陳荻嫩勝穉生枯面柔似張禹氣冽如  
申屠忽逢易牙口一日登君厨君兄昔在日作事



太廉隅宦游三十年不治一室燕嘗載米之郡政  
如置水盂不義獲八珍棄之猶莖茶相對話終日  
茗椀無鹽酥見客惟恐遲遇飯不擇麤無食但有  
名窮不亦宜乎我本寒素士卧雪袁司徒臭味偶  
相似豈是敦薄夫見君食蒿醬取嘲於仕途和君  
蒿醬詩緼袍隨衣狐詩醬兩情苦此債無由逋蒿  
荻無棄材奈此蒼松株何當列劔甕一依饗禮圖  
唯聞廣廷樂不見轅門鈇此日雖無醬猶堪養羸

軀

元裕之以山遊見詒兼以詩四首爲寄因以  
山中之意仍其韵

石華政可採負我孤舟蓬胡爲紅塵裏擾擾槐安  
宮山間綠蘿月一照千巖空洪崖去不返清游誰  
與同空餘松根泉雜佩流無窮人心隨泥滓不如  
與天通舉頭視霄漢浩露洗心胸

文



日月兩角蝸天地一粒粟老盆可徑醉豈擇瓦與  
玉大笑區中人朱門巧梁肉清曉登少室日夕眺  
玉屋紫煙晞吾髮碧霞貯我腹溪中有白雲萬事  
付濯足物物愜幽情不獨蘭與菊

又

南風入桂樹高葉碧崢嶸舉手戲攀折上與雲煙  
撐黃金間白玉遍地先晶熒笙簫坐間發鸞鶴空  
中鳴浩歌山谷應起舞衣裳輕一尊石上酒如我

浩氣盈目送飛鴻盡青雲萬里平

又

國風久已熄如火不再然流爲玉臺詠鉛粉嬌華  
年政須洗妖冶八駿踏芝田青苔明月露碧樹涼  
風天塵土一一畫象緯昭昭懸寂寥抱玉舞爭競  
搖尾憐幸有元公子不爲常語牽

許方邨即事

聯句  
體

披熱達許方山巔青漫漫野黃麥初割畦綠蔬纔



灌春籬綠葉深巷樹春花亂煙長見新冶風遠聞  
清鍛濯衣女在溪販鐵人棲館墻危壘破石路黑  
沾遺炭山雲頃刻雨沙地須臾曠鐸鳴駕犢耕罩  
密防雞散縹餘殘繭掛釣罷么絲貫沽酒有客賒  
鬻李何人喚朴慙官始威牒煩民更玩歷險小車  
多逢人黷衣半縣遠肉難求山近寇可道何當卜  
隱居尋我杖藜伴

梁山宮圖

梁山宮高高切雲秦家簫鼓空中聞宮殿作雲王  
作龍何人敢謁瀉池君珠圍翠繞窮天下道上行  
人衣半赭不覺生靈血液枯化爲宮上鴛鴦瓦朝  
盧生暮侯生師事二人學兼門焉知以政藏其身  
神仙亦死何曾神空龍詐取六孱國不識盧生真  
間客種成間隙盧生去尚令道士作鬼語祖龍竟  
隋此機中以辭見欺猶未悟魚腥引得扛鼎來梁  
山火滅漢旗開何如後世丹青手一夫不役千樓



臺梁山之圖却傳世梁山之宮安在哉

跋伯玉命簡之臨米元章楚山圖

巴東峽壁如駁霞天鑿荆門當虎牙下有奔湍沉  
碧沙直衝北固如投家雲煙昏曉互明滅朝看沃  
日暮吞月遠山如指近如拳過客那知空一瞥高  
人廬此恨來晚不厭孤篷疊往返莫言造物好窮  
人許大乾坤富君眼以心爲鏡照諸山山如人面  
紛殊顏扁舟日日青山上青山却在滄波間人道

癡兒固貪取我怪高人亦如許已將胸次祗長江  
更把豪端扛巨楚薺列楓林葉浮舸巧促魁梧入  
么麼丈尋收拾無邊春千里遊邀坐中我自此頭  
吳尾甌越蠻烟五月髭人髮江山多處乃爾毒始  
信中原天下甲楚山可覽不可上水氣昏昏且多  
恙画山縱不到真山有楚之峯無楚瘴靜明居士  
見山饒想在菴中得飽叅戲辨老李臨君画已坐  
君貪我更貪



秋雨小霽湖陽道中

一雨初晴菊瘁花朝來啼殺報晴鴉地隣異域空  
懷古人對殘秋更憶家十月紅爐是明日往年新  
火醉流霞忽忽又上湖陽道何處還堪駐客槎

秋望

雲氣東南壯風煙正北長遠人投屋小寒草帶城  
荒馴鴨便秋潦飢牛背夕陽關情儘堪画未要雨  
浪浪

堂谿城南感寓

斷岸崩崖帶草長茂林高塹晚生涼田頭經水成  
駒卧雲色回風變狗蒼戰地尚餘唐壘柵故城曾  
入楚封疆牛童趁日貪捫蝨那解興亡事可傷

俳優

施能賣晉移君貳旃解譏秦救陸郎多少諫臣翻  
獲罪却教若輩管興亡

李道人家山圖



見說高齋住太行溪山襟帶古祠堂  
圭桐葉落周家雨鐵樹根盤晉國霜  
烽火不堪耕夜月画图猶可掛殘陽  
自憐不及汾州鴈春去秋來過石梁

李道人嵩陽歸隱圖

城郭維崇井里維通冠蓋維錯紉綺維襲云誰之  
子招子歸嵩舍我箏筑樂彼潺淙食彼瓦缶遺我  
鼎鍾云誰之子繪子歸嵩離人友鹿避俗朋松石  
啣我足泉瘦我隴吾恐時人笑子歸嵩有山有怪

有水有龍盜出寇沒嘯兇咻熊吾恐狂人誑子歸  
嵩子謂我言決意歸嵩歸嵩何如如鴻避弋如鶴  
脫籠與幻俱化與化俱融是以歸嵩南山重重翠  
如植蔥北山隆隆紺如堆銅仰嵩俛嵩雨濯雲烘  
嵩之爲我我之爲嵩我聞子言衣如張風心先去  
鳥層雲盪胸靜言思之富爲目嵩貴爲心蓬飾說  
子令詎知任公歸嵩良是生龜脫筒子不歸嵩送  
子歸嵩



陽夏何正卿作疊語回句未成章予復以疊  
語寄之凡四變文

緼緼蠢蠢何等民矯矯亢亢內守貞昂昂歲歲獨  
異俗落落莫莫不厭貧歸與歸與且餬口鳳兮鳳  
子德衰久樂云樂云無絃琴命乎命乎一杯酒匪  
鱸匪鮪故爲藏避言避世必也狂至大至剛秣吾  
馬爰清爰淨脩我墻用之捨之時所係晉如摧如  
寧復計暖然淒然任春秋優哉游哉聊卒歲

紅梅

一種冰魂物已尤朱唇點注更風流歲寒未許東  
風管澹抹穠粧得自由

劉御史從益

三十三首

從益字雲卿南山翁撫之曾孫大安元年  
進士拜監察御史坐與當路者辨曲直得  
罪去久之起爲葉縣令脩學講義徭善抑  
惡有古良吏之風葉劇邑也兵興以來戶



減三之一田不毛者萬七千畝其歲入七  
 萬石故在也雲卿請於大農為減一萬民  
 賴之流亡歸者二千餘家未幾被召百姓  
 詣臺乞留不聽入授應奉翰林文字踰月  
 以疾卒時年四十四葉人間之以端午罷  
 酒為位而哭且立石頌德以致哀思之心  
 焉雲卿博學強記於經學有所得為文章  
 長於詩五言古詩又其所長雷御史說雲

卿在太學時年甚少嘗有詩云黃金錯落

雲間關紅粉高低柳外墻時輩皆推服之

其卒以詩得名者固已見於此矣雲卿詩如荒烟

斜日村村晚衰柳寒蒲岸岸秋兩鄉畱寓  
 風翼面千里相望月滿襟子美不妨衣露  
 肘長卿猶有賦凌雲春雪云千層寶樓閣  
 一片玉山川臨終云壞壁秋燈挑夢破老  
 梧寒雨滴愁生此類  
 甚多不能悉載也有蓬門先生集行於

世二子初字京棘郁字文季俱有名於時

題蘇李合画淵明濯足圖



天機本自足人事或相須東坡画三昧迺與龍眠  
俱黃州富丘壑餘杭渺江湖已困口嘲弄更堪手  
糊塗其來本游戲所到非功夫平生斜川翁尚友  
千載餘可聞不可見風標定何如笑倩李居士爲  
予巧形模臨流想有詩滄浪元非漁不入聲利場  
政恐吾足汗二公有深意百年留此圖不著色塵  
相澹然如游天地初主人牢緘滕丹青有淪此不  
淪

過尉氏懷阮籍

朝來國門遊暮抵蓬池宿有懷阮步兵豪氣無檢  
束嘯歌陟高臺長風振林木老眼何曾青四海無  
一物萬古留詩名九原銷醉骨居然方大家惜也  
微瑕玉塗窮道不窮先生安用笑

延舟回瀾亭坐中作

昔年醉回瀾猶恨身屬官今年邂逅來身與亭俱  
開洗心亭下水照眼亭西山溪山如故人喜我復



來還有酒澆我胸有花怡我顏  
鞞鷹乍脫臂但覺天地寬  
山陰忽回船夜闌情未闌

樂山松

樂山一何崇上有千歲松  
清孤月露底秀拔天地  
中蒲柳抱常質桃李鬪  
芳容爭如十八公笑傲冰  
霜風居然喜避世不肯汗  
秦封蟠如北海螭伏如  
南陽龍紛紛過者多  
匠石終不逢明堂幾時  
構喚起蒼髯翁

和淵明雜詩二首

俗士苦紛競此心本無塵  
功名廼外物了不關吾  
身吾身復何有形神假  
相親天地開一室日月  
挾兩鄰有生即有仁如  
晏之必晨但得酒中了  
亦足稱達人揮戈欲却  
日小力自不量何如任  
天運閉門坐齋芳詩書  
列四隅著我於中央夏  
卧北窗風隆冬曝朝陽  
但有藜藿羹亦足克飢腸

又



少爲飢所驅老爲病所迫人生能幾何東阡復南陌  
急須沽酒來一笑舉太白浩歌草木振起舞天地  
窄同歡二三子誰主復誰客浮沉大浪中畢竟  
歸真宅歲月去何速老炎變新涼游子久不歸回  
首望大梁風埃慘如此何處真吾鄉野菊明落日  
林楓染飛霜勸我一杯酒悠然秋興長

和淵明始春懷田舍

家食自不惡菽水甘清貧學道未有得讀書亦良

勤雖勤竟何補俛首愧古人靜言閱世故來者日  
月新况復抱沉疴百憂無一忻安得衛生訣益我  
華池津况如一夢覺不與萬法鄰野人借問我恐  
是劉遺民

和淵明飲酒韻

日入了公事援琴洗塵喧秋堂一燈明清響到夜  
偏彈罷枕書卧渺然夢青山山英向我問君駕何  
時還家僮忽喚覺惆悵不能言



臘日次幽居韻

世務方擾擾人生何營營  
不如不出門坐頭天地  
情泰中有否來陰極即陽生  
掀髯一笑起牖外風  
鐸鳴看雲偶獨立踏雪時  
關行最愛朝日升負暄  
向南榮

歲除夕次東坡守歲韻

人生都百年誰問鬪龜蛇  
容顏鏡中換老醜不可  
遮殷勤守此歲來歲復如何  
南鄰祭竈喧北里驅

儺譁須臾罷無爲但聽樓鼓過  
明朝四十過暮景  
真易斜初心自慷慨白首還蹉跎  
寄語少年子雖  
健不足誇

次韻別歲

一日復一日其來不肯遲  
一冬復一春既去誰能  
追問歲果安往惜不知津涯常於歲除夕  
知是相  
別時鄰翁慣禮餞買酒烹鮮肥  
百挽不得留一別  
那須悲年年例如  
此華髮吾何辭  
惟有學道心自



覺老不衰

次韻餽歲

親朋餉無時鄰里歡有佐况當歲之終可以具百  
貨禮意各示勤手段不妨大我貧無往還閉戶但  
高卧藜羹且充腸珍味不登坐猶勝許文休衣食  
出馬磨自非揚子雲載酒何人過空吟餽歲詩自  
歌還自和

清明即事用前韻

一度清明了一年溫風嫋嫋雨班班幾家繡幃尋  
芳去何處蹇驢馱醉還宿草新墳驚世短落花流  
水占春闌曉鶯啼破松蘿夢缺月東南掛屋山

五月十四日夜對月有感

世事易隨雲變滅人生難保月團圓淮陽旅舍三  
年夢河朔風聲五月寒何處雲山端可老向來天  
地爲誰寬宦游脚底生荆棘蜀道而今却不難  
再過郾城示伯玉知幾



三年兩度過潞陽鞍馬紅塵道路長花月不應知  
 我老溪山也解笑人忙朔風凜凜頻驚坐夜雨蕭  
 蕭偶對寐他日水南營葬地愧無遺愛在桐鄉

次韻關關公夢歸

看間喜色幾時黃滿貯羈愁著瘦腸萬里鄉關飛  
 不到十年歧路走空忙孟心蘸月松梢影鼻觀通  
 風柏子香最愛南山舊山色夢中相覓不相忘

題關關公夢歸詩後用棘通韻

學道幾人知道味謀生底物是生涯莊周枕上非  
 真蝶樂廣杯中亦假蛇身後功名半張紙夜來鼓  
 次一池蛙夢間說夢重重夢家外忘家處處家

送儀提點西歸

自斷平生不問天拂衣歸去任吾年五侯鯖飽無  
 多味九老圖成又一傳回首京華瞻日遠放懷鄉  
 社得天全綸巾醉卧咸陽市始信人間有散仙

再賡



人定端能坐勝天，刀圭有力制頽年。道非出世頭  
頭是丹，不遺經口口傳陰魄，沉迷終鬼錄。陽精飛  
鍊即神全，三山縹緲誰能到。目下身安亦是仙。

次韵李公度

併有儲糧鬢有絲，蹉跎歲晚坐書癡。輞川画隱王  
摩詰錦里詩窮杜拾遺，應舉尚陪新進士。主文半  
是舊相知，春闈看決魚龍陣。未必尖錐勝鈍錐。

題無盡藏

梁斗南  
所藏画

誰開天地祕密藏，今古人間用不窮。眼尾搖光千  
丈月，耳根傳響一溪風。勝游赤壁文章在高卧，燕  
山氣象同二老。風流渺何許，後生猶可画圖中。

三弟手植瓢材且有詩予亦戲作

爲愛胡盧手自栽，弱條柔蔓漸縈回。素花飄後初  
成實，碧蔭濃時可數枚。試問老禪藤繳去何如，游  
子杖挑來早知瓠落終無用。只合江湖養不才。

次韻三弟贈南庵老人



一庵盤礴勝巢仙不入叢林恰是禪  
花圃蓮塘開打景粥盂齋鉢老隨緣  
忘言已了八千偈適意更揮三兩絃  
邂逅我來推不去坐分一半好風煙

次韵劉少宣

旅牖蝶夢曉驚回默數流年祇自哀  
與世迂踈甘袖手及身强健且銜杯  
桐凋翠葉看看盡菊著黃花旋旋開  
杖屨南庵訪幽事秋光滿眼送詩來

酬李子遷

曾著朱衣侍冕旒忽乘羸馬出皇州  
青山有約攜琴往白髮無成把鏡羞  
却笑張儀誇舌在不妨巢父有詩留  
柳湖莎徑東南夢又見兒童逐細笑

過洧川次侯生君澤韵

誰能孤憤效韓非且喜玄微對鏡機  
出得山來無遠志寄將書去有當歸  
閑居已判平生了真賞從教舉世稀  
日咀道腴深有味更須口腹事甘肥

聞菴用少陵韻



唧唧不堪聞村居更惱人青衫傷久客華髮念雙  
親歲暮那逢雨秋宵未向晨石心猶可轉百感本  
來真

除夕用少陵韻

癯送迢迢漏燈開艷艷花正愁聞過鴈久客羨栖  
鴉放眼春猶好驚心日又斜一蓑江上雨歸思浩  
無涯

即事

卧疾劉公幹躬耕鄭子真溪山畱好客天地許開  
人花醉紅沾袖松吟翠繞身捫心無所歎持此壽  
吾親

宋樓道中

十里羊腸路詰盤過花穿柳幾迴還馬頭忽轉青  
林角綠繞入家水一灣

過武丁廟

旱則爲霖水則舟若人端合夢中求荆王枕上陽



臺雨板築英雄老死休

戲荅侯威卿覓墨

萬松火厄化緇塵依舊徂徠雪裏春冷劑香螺夔  
一足破慳分與画眉人

宮中取張遇墨燒去膠以之画眉謂之画眉墨

北園

碧梧斜影落胡麻白葛烏巾滿意涼宴坐不知紅  
日晚筭輿歸路麥花香

宋内翰九嘉

十一首

九嘉字飛卿夏津人黃裳榜進士乙科歷

藍田高陵扶風三水四縣令皆有能聲入

爲右警巡使應奉翰林文字正大中病失

音廢居歿於癸巳之禍嘗有詩云浩歌風

露下醉袖拂南山又題壽安烟霞亭云糝

鑿土薜紅千點界畫銀沙綠一鈎其才藻

可畧見矣

途中書事三首



幼穉扶輪婦挽轅連顛翁媪抱諸孫飢民羸卒如  
流水掘盡原頭野薺根

又

老穉扶攜訪熟鄉驛塵滿路殢相望終朝拾穗不  
盈把只有流民如麥芒

又

攘絲奪麥人爭略烘日吹風天有年湯餅元非小  
人腹蠶絲都作大夫賢

館中納涼書事

涼洒塵纓曠耳醒虛堂窈渺好風清雀知愛子來  
迴哺鼠不畏人旁午行每用熟眠酬閒寂端知固  
有享高明宦遊非不佳官府奔走塵勞漫一生

東州有感

東城衰草漫黃沙故壘周遭小范衙牧豎那知真  
老子龜趺繫馬卧吹笳

搗金明砦作建除體



建牙誓諸將梟鳴軍盡驚除道非戰事銜枚幻竒  
 兵滿鎧霜日輝行陣寂無聲平旦飛出谷桑棗蔽  
 金明定知此陳迹中原遮寇城執鞭吾不及范公  
 凜如生破碑字仍在巔巔卧深荆危襟按其壘信  
 哉天下英成敗翻覆手狐兔今橫行收復會有時  
 夷吾當請纓開圖睨替亢按劍逐長鯨閉塞亦已  
 以一揮氛曠清

被檄從軍

不巾不襪柳陰行朝醉南村暮北莊一旦捉將官

裏去直驅盲馬陣中央

即所乘盲馬而言

番別孫俊民姚公茂

草根殘日射離觴主席風生熱肺腸此去兜零紅  
 照夜輸君吹笛傷糟牀

酴醿菊

酴醿風味醺人醉著莫東籬愛酒翁一夜金英全  
 換骨冷香晴雪滿秋風



蓮社圖

野鷺家雞俗好乖虎溪泉石滿塵埃壯哉砥柱頽

波裏惟有淵明挽不來飛卿不喜佛法自言平生有三恨一恨佛老之說不

出於孔氏前二恨辭學之士多好譯經潤文三恨大才而攻異端淵明挽不來之句蓋自况也

卯酒

臘蟻初浮社甕筭宿醒正渴卯時投醉鄉兀兀陶

陶裏底事形骸底事愁

雷御史淵三十九首

淵字希顏別字季默同知北京路轉運使

事思之季子崇慶二年黃裳榜進士甲科

釋褐涇州錄事徐州觀察判官召為荆王

府文學兼記室叅軍轉應奉翰林文字同

知制誥兼國史院編脩官拜監察御史以

公事免用宰相戾莘卿薦除太學博士還

應奉終于翰林脩撰初在東平東平河朔

重兵處也驕將悍卒倚外寇為重自行臺



以下皆務爲摩拊之希顏蒞官自律者甚  
嚴出入軍中偃然不爲屈不數月閭巷間  
家有希顏画像雖大將亦不敢新進書生  
遇之嘗爲戶部高尚書所辟權遂平縣事  
時年少氣銳擊蒙右發姦伏一縣畏之稱  
爲神明及以御史巡行河南百姓相傳雷  
御史至豪猾望風遁去正大庚寅倒廻谷  
之後希顏上書破朝臣孤注之論引援深

切灼然易見而主兵者沮之榮爲不行至  
今以願望爲當國者之恨希顏三歲喪父  
七歲養於諸兄年十四五貧無以爲資乃  
以胄子入國學便能自樹立如成人不二  
十游公卿間太學諸人莫敢與之齒渡河  
後學益博文益竒名益重爲人軀幹雄偉  
髯張口哆顏渥丹眼如望羊遇不平則疾  
惡之氣見於顏間或嚼齒大罵不休雖痛



自摧折然粹亦不能變也生平慕田疇陳  
元龍之為人而人亦以古人期之故雖以  
文章見稱在希顏仍為餘事耳

雲卿父子有宛丘之行作二詩為餞

陽春到上林百卉紛白紅岸谷稍敷腴溪光亦冲  
融獨有石間柏不落鼓舞中期君如此木歲晚延

清風

又

漢庭議論學傾耳待歆向君家賢父子千載蔚相  
望讀書二十年閉戶自師匠異端絀偏雜陳言刊  
猥釀剛全百鍊餘氣出諸老上頽風正波靡夫去  
作隄障

京叔將拜掃于陳徵言為贈老嬾廢學茫  
無所得獨記其與屏山雲卿襟期所在者  
非以為詩也

梁苑池塘生綠烟吹臺草色春芊芊故人幽扃閉



長眠氣槩英英猶眼前陽春無力蘇重泉孝子感  
時涕泗漣匄匄掃淮陽旣微予贈別意拳拳我自  
頑頓須人鐫安能視後輒子鞭姬情孔意星日  
懸幹旋萬化中持權斯文興喪實關天尋常墨客  
技藝然鬻巫星曆相比肩何用雕琢空徂年即今  
海縣謾腥膻獨挽洙泗可洗滌迺公有志屏山賢  
二豪在日予牽連傷哉未售墳已顛老我欲種南  
山田子之兄弟其周旋事業絕勝空言傳

同裕之欽叔分韻得莫論二字

幼安謝辟命子雲老寂莫趨嚮豈獨異時命非所  
度我久困流離一壘求負郭雖無斬敵功尚舉力  
田爵崧少啓吾封四履盡伊落有客來問津醉眼  
入寨廓世事久閉眼終日只睡昏清風何處來佳  
客已在門倒屣往從之玉色向我溫妻孥趣作具  
歡喜傾瓶盆清夜襍被往共就遺山元嘲詈及俳  
語發揮間微言懸斷漏天樞高嘯驚鄰垣昭合政



相和意到傲孤騫恨不倒困廩矧肯留籬樊棄厲  
 獲珠玉披榛見蘭蓀我肱已三折醉隨偶全渾知  
 無適俗剖量力任灌園二君清廟器巾屨華鬯尊  
 蒼生望休息朝廷待崇尊出處既異途會合難預  
 論此樂未易得此夕勿憚煩白酒舉初子黃雞溷  
 諸孫水樂喧後部山鬟秀前軒一醉萬事休商聲  
 滿乾坤

會善寺怪松

物生自有常怪特物之病嗟嗟此老蒼恠恠生魁  
 柄侏儒感髀股宿癯攤腮頸蛇涎蛟龍戲騰擲豸  
 虎競須髯喜張磔意氣怒狂迸匠石求棟楹節目  
 足譏評翳莛急薪慙堅悍空盻瞪靜言觀倚伏未  
 易相弔慶雖違時世用願免斤斧橫陽秋莫榮悴  
 歲月何究竟盤盤曲則全挺挺獨也正小草悞掃  
 迹伏神還守性儻隨天中景廣宇共麻暎

玉華山中同裕之分韻送欽叔得端字



洗耳潁川水療飢西山薇山川得佳客草木生光  
輝末路風教薄此道日已微相期千載事非君誰  
與歸

九日登少室絕頂同裕之分韻得蘿字

關居愛重九佳人重相過登高酬節物少室鬱嵯  
峨迤邐謝塵土夷猶出煙蘿欸如據鼇頭萬壑俯  
蜂窩浩浩跨積風瀾瀾渺長河日車曷紅輪天宇  
凝蒼波指點數齊州始覺氛埃多我無倚天劍有

淡空濤沲驚鱗盼奧渚倦翼占危柯悔不與家來  
結茅老巖阿埽途睠老阮廣武意如何

月下卧飛伯觀畦丁灌園得畦字

村居鄰老圃喘汗憫夏畦輓轡健晚涼月輪轉天  
蹊剌剌金融溝涓涓冰泮溪黃萋漸蘇息綠潤俄  
溲迷生意續夜氣甘滋決新萸風露觸處香河漢  
望中低野人無遠謀且喜豐食鮭雖愧下帷董稍  
悟養生嵇埽懷自浩然流光挹平西



濟南珍珠泉

大地萬寶藏玄冥不敢私拱開青玉罅  
 渾渾流珠璣輕明疑夜光潔白真摩尼  
 風吹忽脫串目射俄生輝有時如少靳  
 感沸却纍纍風色媚一川老蚌初未知  
 君看一日間巧歷所不貨遊人隨意滿  
 不界乾沒兒吾謂歷下城繁華富瑰奇  
 貪夫苑專利帝意怜其癡故露連城珍  
 可玩不可幾若曰天壤間所遇皆汝資  
 何必秘篋笥自貽伊瑕疵詩成一

大笑臆說量天機

讀孔北海傳

元本孔下空一字

漢室風流絕建安老瞞父子力排山  
 可憐魯國真男子也着區區七子間

賦僕相公雲溪

相君襟度本汪洋戲鑿陂池便渺茫  
 解起晴雲作霖雨更邀明月貯清光  
 千重複嶺藏仙境萬斛香泉釀醉鄉  
 畢竟麟符拋不得烟波空效五湖蒼



贈陳司諫正誅

洗兵有志挽天河補袞剛留諫諍坡賦出石腸還  
婉麗政成鐵面却中和寒侵桃李淒無色雪壓池  
塘慄不波急手尊前謀一醉六街塵土浼人多

濟南泛舟水底見山有感而作

南山已在風塵外更恐飛埃浼碧巔一棹晚涼波  
底看洛沂面目本天然

洛陽同裕之欽棘賦

日上煙花一片紅崧卽西峙洛川東纔聞候騎傳  
青蓋又見牽羊出絳宮事去關河不橫草秋來陵  
寢但飛蓬書生不奈興亡恨斗酒聊澆魄磊胸

啓母石同裕之賦

千古崩崖一罅開強將神恠附郊禰無情頑石猶  
胎讒貝錦從爲巷伯哀

贈答麻信之

并序

麻弟避兵渡河徑謁裕之

于崧高夤緣一見相與之意甚厚既留數日



又將過吾景玄于女几之陰維元劉國士也  
而弟游於其間則弟之爲人可知已臨行復  
長歌相贈清平豐融蓋他日未易量也愛仰  
不足詩以送之

五老英靈未陸沉一枝高秀出詞林珪璋自是清  
朝噐律呂偏諧治世音此去文章足知己後來功  
用只齋心濟時相約元劉了索我雲山深復深

雪

元本在前

風定雲仍暖天圍四顧低紛紛俄攬野浩浩欲平  
溪樵擔婦時重漁舟望處迷飢鴉空繞樹若箇可  
安棲

宮鴉

萬樹瓊芳鎖漢宮群鴉容與五雲中曙光先背朝  
陽日春信頻呼禁籞風青鬢巧梳欣一色秀眉學  
画闌新工鳳樓未訝啼聲切愁滿長門信未通

洮石硯



中州集 五十八  
緹囊深複有滄洲  
丈石春融翠欲流  
退筆成丘竟  
何益乘時真欲礪  
吳鉤

馬上見桃花

九衢鞍馬苦塵腥  
忽見溪桃倦意醒  
未必施朱便  
麤俗最憐滌露出  
娉婷城東詩老圖  
幽絕水上仙  
卽記窈冥何似玉  
堂留故事  
賣花擔上有丹青

叔獻兄歸隱崧山有詩見及依韻奉寄

幾百千年一敬通  
飄飄歸袂振孤風  
平生自處神

明在衰俗無從議論  
公韶箭向來儀彩  
鳳弋繒何  
苦慕冥鴻他年杖屨  
相尋處三十六峯雲  
霧中

劉御史雲卿挽詞二首

氣幹參天擬萬尋  
聖門梁棟自堪任  
牙冠岳岳鋒  
稜峻鳧鳥翩翩惠  
愛深可恐佳城玉埋  
土最哀慈  
幄五雷襟傳家賴有  
雙珠在不爾何如慰  
士林

又

少同里閭早知音  
投分交情兩舊今  
鄉校聯裾春



誦學上庠連榻夜論心南山松桂愁霜殞北地乾坤恨日侵不得生芻躬一奠西風吹淚滿衣襟

題黃華江皋烟樹二首

疎柳靜苑亭亭下長江路不見亭中人蕭蕭烟景

暮

又

江山萬里眼一亭畧約之黃華未死在看取画中

詩

送李執剛致仕歸洛

漕計中興屬老成引年陳請獨崢嶸果能辦此公  
真勇愛莫留之我愴情塵全恐驚黃鵠舉烟波不  
負白鷗盟洛陽去去春如錦晝日神仙看地行

梨花得紅字

雪作肌膚玉作容不將妖艷嫁東風梅魂何物三  
春在桃臉真成一  
笑空雨細無情添寂寞無情亦作淚痕  
月明有意助豐融有意助亦作真態更相如病渴妨文賦想



像甘寒結小紅

河山形勝圖

高峯巨壑與天連  
中國關防表裏全  
北岬塵氛重  
回首不如圖上看風煙

次裕之韻兼及景玄弟

名勝相煥半成灰  
戰退紛華旆始迴  
文字喜逢脩  
月手津梁愧乏濟  
川材等闕有酒輒共醉  
信口哦  
詩不置才最憶平生劉子駿  
紫芝可惜不偕來

愛詩李道人若愚崧陽歸隱圖

我家崧前凡再葺  
詩僧騷客相追隨  
春葩繽紛香  
澗谷夏泉噴薄清  
心脾霜林置酒曳錦障  
雪嶺探  
梅登玉螭重陽夜宿太平頂  
天雞夜半鳴  
嗶嘰整  
冠東望見日出金輪湧  
海光陸離神州赤  
縣入指  
顧風埃未靖空噓歔  
窮探極覽不知老  
泉石佳處  
多留題簡書  
驅出踏朝市  
期會迫  
窄愁鞭笞襟懷  
塵土少清夢  
齒頰棘荆真白癩  
叩門剝啄者誰子



道人面有熊豹姿披圖二室忽當眼貫珠編貝多  
 文辭我離山以詩筆退摹寫豈復能清竒并三要  
 索不忍拒依依但記經行時道人愛山復愛詩嗜  
 好成癖未易醫山中詩友莫相厭遠勝薰酣聲利  
 乾沒兒

李右司獻能 二十首

獻能字欽叔河中人年二十一以省元賜  
 第廷試第一人宏詞優等授應奉翰林文

字在翰苑凡十年出為鄜州觀察判官用  
 薦者復應奉俄遷脩撰以鎮南軍節度副  
 使充河中經歷正大八年河中陷獨得一  
 船走陝州被召以道梗不能赴就權陝府  
 行省左右司郎中軍變遇禍欽叔資稟明  
 敏博聞強記輩流中少見其比為人誠實  
 樂易洞見肺腑世間狡獪變詐纖悉無不  
 知然羞之不道也與人交不立崖岸盃



酒相然諾赴難解紛不自顧惜雖小書生  
以愛兄之道來亦殷勤接納傾筐倒庋無  
復餘地時輩以此歸之家故饒財盡於貞  
祐之亂京師冷官食貧口衆無以自資太  
夫人素豪侈厚於自奉小不如意則有金  
魚墮地之譴人視之殆不堪其憂而欽叔  
處之自若也欽叔文章行業過人處甚多  
而天下獨以其純孝為不可及云

贈王飛伯雜言一首

東風吹客衣敗絮逐風飛曉雪沒寒薺無物克朝  
飢空篋嘖嘖號飢鼠饕蝨蠕蠕緣破袴人生豈是  
犬與雞終歲區區守門戶游說萬乘苦不早儀秦  
殆是穿窬盜六國印千金車滿眼榮華鏡中老孔  
子聘列國孟軻游齊梁能令千載後名與日月光  
男兒生世不虛生死恨身後無聲名不然鳴玉遊  
紫京不然著書談六經九日可射天可補鞭笞百



蠻作降虜離騷一篇亦不惡雄筆盤盤映千古君  
 不見彩鳳翔丹霄二鳴應九韶寸雲起泰山霖雨  
 滿人間丈夫窮達果在天安用兒女得志相歆羨  
 矢志相悲憐仰天大笑出門去四海今誰魯仲連

夜宿虛皇閣下

倚天青壁截雲霞一水高懸界削瓜不惜玲竝禁  
 石磴要看絢爛圻雲華玉峰影裏虛皇閣鐵笛聲  
 中祕監家明日川塗入塵土却應平地幾褒斜

玉華谷同希顏裕之分韻得秋字

玉龍落峽噴飛流空翠霏霏晚不收軟脚山堂一  
 壺酒暮涼關對兩峯秋

四皓圖

弋繒安足致冥鴻自是兼懷翊贊功謾說壺關有  
 遺老望思臺上已秋風

二老雪行圖二首

自笑膠膠擾擾身十年匹馬走紅塵何時雪滿平



生履太華峰前約故人

又

抱琴衝雪又衝風二老風流阿睹中未似村翁眇  
抹眼火爐頭上話年豐

別馮駕之

東風弄微寒吹雪作輕陰春歸未得歸愁攬客子  
心與君俱異縣那復重分襟感時復恨別老懷苦  
難任憶昨滎陽會燈火語夜深縱談閒俳語浩歌

雜狂吟相期梁宋游感君肯相尋西園偶差池市  
樓成孤斟相逢洧水湄暫爾成盍簪燕鴻還別去  
又復如商參我行落日邊匹馬獨登臨君方無定  
在倦翼思茂林人堪幾回別老境各駸駸洧水不  
西流雙魚定沉沉幸有西飛鴻無吝金玉音

昆陽元夜南寺小集

春皋短短生蘭芽東風嫋嫋吹芳華暗黃著柳小  
梅素月姊新年恰十五東皇太一來翩翩竹宮神



光祀甘泉茂陵弓劍沒秋草鳳燈煌煌空自然當年曼衍魚龍舞回頭昭陽化飛土昆陽客舍冷于冰破殿蕭條佛燈古雪消梁苑想春紅車如流水馬游龍銀鉞載酒隨春風酒酣一爵百杯空韶華過眼弦上箭人生得酒從歡醺北斗闌干夜叅半耿耿踈星淡河漢

追憶潁亭泛舟寄陽翟諸友

十月冬氣寒清霜殞群木輕舟泛潁水微風吹野

眼信流不知還石艇橫老玉苔花錦爛斑懸溜珠麗殺頗離塵市雜倒瀉軒裳俗歲月今幾何春草萋以綠懷歸劇飢渴仰羨雙飛鵠矯首九山雲迢迢傷遠目

邳城秋夜懷李仁卿

日入群動息暝色陰濛濛故人隔潁水孀孀生秋風輕風捲纖雲碧漢磨青銅坐久襟袖涼皎月升天東伊人如此月霽色羅心胸可望不可親倏已



駕飛鴻念此太虛間  
心交神自通而况千里月相  
望寧不同孤光透薄帷  
儼如接音容翻翻繞枝鵲  
唧唧侵堦蛩上床轉不寐  
高樓待晨鍾相思夜何  
永月落秋寐空

題飛伯詩囊飛伯以布爲囊采當世名卿詩  
投其中

潁露毛錐祇自賢  
智如樗腹但求全  
迂疎差似淵  
才富羞澀猶無杜  
老錢收拾珠璣三萬斛  
貯儲風

月一千篇嘔心大勝奚奴錦  
要與風人被管絃

送王飛伯歸陽翟

故舊相望似曉星  
平生懷抱向君傾  
朱絲不入箏  
箏耳彩鳳終儀韶  
濩聲三楚迢迢動離思  
九山落  
落助高情一屣擬就隆中卧  
要子同躬壠上耕

西園春日

的皜冰梢出短墻  
泓澄暖綠靜橫塘  
娟娟高竹迎  
人翠孌孌長紅隔  
水香病起心情踈  
酒醖朝來風



色妬年芳只應歸去芸窗晚夢到湘妃錦瑟傷

滎陽古城登覽寄裕之

突兀高臺上古城登臨人境兩崢嶸關河落日歲  
云暮草木臨風氣未平虎擲龍拏王伯事天荒地  
老古今情一盃欲洗興亡恨為喚窮途阮步兵

從獵口號四首

蓮燭金紗簇簇齊宮槐籠曉尚淒迷景陽鍾罷聽  
殘漏萬馬銜霜不敢嘶

又

閶闔傳符啟九關一聲清蹕駐南山虎賁先導三  
千士天馬初離十二閑

又

爛爛龍旂捧日旂從臣遙認赭紅衣天王清曉親  
孤矢初合今冬第一圍

又

的皪金鐙隨曉星晴天霹靂應弦聲風毛雨血燕



雲在未要草間狐兔驚

上清宮梅同座主關關公賦

厭住盧家白玉堂琳宮瀟灑占年芳  
光生琪樹風霜古影占銀潢  
月露涼物外根株本仙種  
世間紅紫避嚴粧  
鬢頭詞伯今何遜  
一笑詩成字字香

丹陽觀竹宮中移賜

素士如林侍紫清  
紫清新許住蓬瀛  
娟娟粉節霜勻出  
蠹蠹煙梢玉削成  
福地根莖蒙化育  
中天雨

露借恩榮綠章封事朝來奏  
又聽風前彩鳳鳴

王右司渥

十一首

渥字仲澤以字行興定二年進士調管州  
司候不赴壽州防禦使邦獻商州防禦使  
國器武勝節度庭玉愛其才連辟三府經  
歷官在軍中凡十年舉寧陵令未赴丁太  
夫人憂廬墓三年服除復授寧陵正大七年  
朝廷與宋人議和擇可爲行人者仲澤以



才選凡再至揚州制司宋人愛其才有中  
州豪士之目使還以寧陵課最遷一官入  
爲尚書省掾三月即授太學助教充樞密  
院經歷官八年院廢權右司郎中中年失  
利不知所終仲澤博通經史有文采善談  
論工書法妙于琴事詩其專門之學人物  
楚楚若素宦于朝吏事則與冀京又相上  
下其辯博又屏山所許天下談士三人之

一也嘗與予行內鄉山中馬上賦詩云霜  
風十月餘千山錦崢嶸又九日登潁亭見  
寄云茫茫襄城野歲晏多風埃野田半已  
荒草蟲鳴更哀西風吹白雲大隗安在哉  
七聖之所迷而我胡爲來我本林野人初  
無經世材失身鞍馬間坐令雙鬢摧安得  
元紫芝共舉重陽杯詩成西北望九山鬱  
崔嵬此詩脫遺處不復能記憶讀之尚可



以見斯人胸懷之髣髴

仲澤穎上詩不才被棄翻為福拙計

無營却似高是處青山可埋骨誰家白酒不消憂夕陽轉屋卧林影急雨壞橋喧水

聲人喜

傳之

### 穎亭

三載西湖阻勝遊  
穎亭聊喜散羈愁  
九山西絡煙霞去  
一水南吞澗壑流  
賓主唱酬空翠琰  
干戈橫絕自滄洲  
慙慙匹馬從軍去  
慙愧烟波萬里鷗

### 有寄

十年鐵馬暗京華  
客子飄零處處家  
征雁久疎河朔信  
小梅重見汝南花  
棲棲活計依簷雀  
鼎鼎年光赴壑蛇  
舊雨故人應念我  
不來聯句夜煎茶

### 寄京父

憶昔相從在寢丘  
城南城北縱歡遊  
杏花聯句香隨馬  
野水添蠶浪拍舟  
邂逅又成三月別  
飄零合負一春愁  
汝陽淮甸經行徧  
應有新詩為我留

### 餐秀軒



秋風幾日搖霜樾秋色南山兩竒絕野人闥戶終  
日開要看千秋秦嶺雪層崖深谷相吐吞落日白  
鹿東南奔野花雙堦古蘭若樓觀縹緲烟霞昏玉  
山生玉人不識草木四時空好色輞川舊與藍橋  
通細水至今流石室一川黃葉長安秋望望不見  
令人愁書生不是濟時具收得關身成此遊主人  
開筵留客醉山雨多情濕征袂明朝騎馬上七盤  
回首山家但空翠

遊藍田

甲申之秋月建成我行商顏正落木山英似與行  
子期撥霧披雲到山腹古潭千丈照錦峰下有鰲  
龍上棲鵠高風吹雪已多時熊耳雙尖寒欲縮新  
乘一水出龍湫驚見千峰遮木榭南山秀拔北山  
雄劍戟森然對群玉崎嶇直過藍田西始見商山  
真面目悟真峽口忽中斷天末脩眉画濃綠此峽  
何年得此名曾有金仙構華屋西巖石室懸細水



萬斛瓊珠輸輞谷行人尚說有七盤瘦馬已愁疲  
百曲風門放眼望秦川擾擾更嗟塵界踞去年游  
騎渡葭蘆萬里橫行如鬼速灞陵原下馬飲血太  
華峰頭虎擇肉今年九月未防秋始見登場有新  
穀一鞭暮指古招提疎雨有情留客宿主人聞客  
喜相接尊酒笑談如昔夙蹇予懶散本真性臨水  
登山此生足一行作吏志益違十載從軍雙鬢禿  
官家後日鑄五兵便擬買牛耕白鹿

送裕之還嵩山

高懷不受簿書侵清潁鷗盟欲重尋老去宦情知  
我薄關來道念見君深對寐夜雨他年夢滿馬西  
風此日心嵩頂勝游誰得共仙閭仙馭待知音

用古仙人詩語

古仙人辭今附于此

夢入雲山宮闕幽鸞鷺同侶鴛鳳流桂月竟夜  
光不收世俗擾擾成囂湫醉飛星馭鞭金虬八



仙浪迹追真游龜玉筌蹄二十秋摩霄注壑須  
 人求覓劍如或笑刻舟陽燧非無角綺儔元鼎  
 以來虛崑丘東井徒勞冠帶脩松飡竹飲度蜃  
 樓崧頂坐嘯垂直鈎祗應慙愧劉幽州知音者無惜雷  
 跡  
 興定庚辰夏六月望予與元好問趙郡李  
 獻能同游玉華谷又將歷嵩前諸刹因憩  
 於少姨廟元周行廊廡得古仙人詞於壁  
 間然其首章直屋漏雨為所漫剝殆不可

辨乃磴木石而上拂拭汎滌迫視者久之  
 始可完讀觀其體則柏梁事則終始二漢  
 字畫在鍾王之間東井又元鼎所都幽州  
 必賢宗子虞也夫眷眷不忘幽州者非吾  
 田疇尚誰歟田復所事之讎却曹瞞之賞  
 衰俗波蕩中挺挺有烈丈夫風氣其死而  
 不忘蓋無疑其能道此語亦無疑觀者不  
 應以文體古今之變而疑仙語也噫仙山



靈岳宜有閎衍博大之真人往來乎其間  
 而世人莫之識也予三人者乃今見之夫  
 豈偶然哉再拜留跡以附知音者末渾源  
 雷淵題此詩為仙語無疑然直謂田疇則  
 似亦未安屏山李純甫題

遊丹霞下院同裕之鼎玉分得留字

霜落豐山白水收歲華全在竹園頭賦詩鞍馬慙  
 真賞載酒林泉阻勝游野色自隨人意遠夕陽應

為鳥聲聳仙源回首旌旗隔一笛西風喚客愁

下寺土人以竹園頭名之

驛口橋看白蓮

陰陰喬木障晴暉的的水藻照碧漪秋暑困人仍  
 御扇晚風生竹却添衣百年蓬鬢關心切千里蓴  
 羹與願違杖屨頻來約他日不妨先築釣漁磯

蒙城縣齋

穀雨連朝沒麥場官糧未入長官忙堦庭有雨青



中州集 七十五  
鞋開牢戶無人白日長

三門津

層崖摩蒼穹四月號陰風大河三門險神禹萬世  
功他山亦崔嵬砥柱獨尊雄雷霆日鬪擊悍暴愁  
天公劉侯智有餘始令舟楫通仍餘石上穴飛棧  
曾連空遙瞻白玉枝挺植丹竈中仙公去不返此  
事真真蒙夫人與鼓崖怪幻尤難窮獨喜兵火餘  
巋然出新宮當時疏鑿意四海要會同誰知千歲

後築壘防嘯克詩成一大笑浩浩洪波東

被檄再至揚州制司驛亭有題詩譏予和事  
不成者云來往二年無一事青山也解笑行  
人困爲解嘲

二年奔走道途間知被青山笑往還只向江南南  
岸老行人應更笑青山

冀都事禹錫

二首

禹錫字京父龍山人崇慶二年進士調沉



丘簿與縣令者不相能及令以贓敗疑京  
又發之乃賂遺權貴誣京又以賓客依託  
之事坐廢十年朝臣薦其才者積數十人  
終爲銓曹所礙居襄邑部使者起之攝翫  
入近諸縣所至有父母之愛農司治許昌又  
爲主事區處餽餉上下千餘里不露聲迹  
而條畫次第皆具雖鱗雜米鹽若不足經  
意者問之即應如指諸掌一時吏如康伯

祿李欽止諸人多自以爲不及也正大中  
當路諸公極力辨其被誣乃得以常調守  
扶風丞召補省掾不就歸德奏充知事及  
城被攻京又爲經廐官守禦之策一府倚  
重之車駕至授左右司都事兼應奉翰林  
文字官奴之變家人勸京又羸服免禍不  
從人有自外至者京又問賊入禁中否曰  
禁中賊滿矣乃自投水中在京師時希顏



仲澤欽叔京又相得甚歡升堂拜親有昆  
 弟之義而不肖徒以文字之故得幸諸公  
 間希長予六歲澤長四歲欽與京少予二  
 歲希沒于正大辛卯之八月年四十八澤  
 沒于明年之七月年四十七欽沒於其年  
 十一月年四十一歲京沒於又明年之三  
 月年四十二蓋不三二年而五人者惟不  
 肖在耳今日錄諸君子詩感念平昔不覺

流涕之被面也

僧房

上方樓觀袂衣寒霜後川原眼界寬我是禪房未  
 歸客阿師休作長官看

贈雷御史兼及松庵馮文

平生疾惡如風手力振臺綱事所難人道千鈞羞  
 射鼠我怜衆煦解漂山明時士論知無負晚歲交  
 盟豈易寒見說嵩前茹芝老白雲倚杖待君還



中州集卷終





